

Kilanneq – Angajoqqaanut paasissutissiissut

Kilattoqarsimappat angajoqqaatut nappaatip tuniluussinnaaneranut pinaveersaartitseqataa-sinnaavutit. Ilitsersuut atuaruk meeqqallu kilassorigukku sulisut tamatuminnga ilisimatikkit.

Kilaat

Amerluut ungilattoq kilaap uumasuaraanik patsiseqartoq.

Tunillatsinneq

Kilaat ilaqutariinni tutittakkanut tuniluuttarpoq. Inoqutiginnigisanik tunillaaneq qaqutigoortuuvoq. Meeqqat minnerit tigummisaanerusarnerat pissutigalugu meeqquerivinni qaqutigut tuniluus-sinnaasarpoq. Tunillaasinnaaffik: Tunillatsinnerup kingunitsiaaniit nakorsartilernerup tungaanut.

Nappaammut ersiutit

Tunillatsinnermiit napparsimalernerup tungaanut: Siornatigut tunillatsissimannigitsuni sap. ak. sisamat qaangiunneranni ungilleroqalersarpoq siornatigullu tunillatsissimasuni ullualuit qaangiun-nerini ungilleroqalersarluni.

Kilanneq tunillatsinnermiit sap.ak. 3-6 qaangiunneranni pingaartumik unnuami timi tamakkiusallugu ungillernermik ersiuteqartarpoq. Meeqqat ukioqalinngitsut kiinaat kasserilu kilalersarputaaq. Ungil-leringaatsiaraluaaraanniluunniit kuminnikkut kimillannerit tinupasullu annikitsuinnaagajupput. Kilanneq pingaartumik inunni eqqiluisaarluartuni suussusersiuminaatsuusinnaasarpoq.

Kilattoqartillugu maleruagassat

Meeqquerivimmi meeqqat sulisulluunniit allat nakorsartariaqanngillat. Kingullermik kilattoqarneraniit sap.ak. 3-6 qaangiunnerini meeqqat akornanni ungilleralunilu amerlertoqarnera maluginiarneqassaaq.

Nakorsartinneq

Ungilatsitsinermi kilassorinninnermilu, nappaatip suussusersinissaa nakorsarneqarnissaalu siuner-taralugit, nakorsaq attavigineqassaaq.

Kilaasut paasineqarpat inoqutigiit allallu kilattup tutitarisimasai tamakkerlutik nakorsartittariaqarput. Ilaquttat ilaat suli ersiuteqanngikkaluamik tunillatsissimasinnaammata, ataatsikkut nakorsartinnissaq pingaaruteqarpoq. Nakorsartininnermi allarutit oqorutillu minnerpaamik 60° C-imik kissassusilimmi errorneqassapput. Nakorsartereernermi tunillaasoqarsinnaajunnaassaaq ungilleroqarallarsinnaal-lunili.

Meeqquerivimmuqaqqinnissaq

Nakorsarneqalereernermi.